



INATISARTUT

## Aningaasaqarnermut Akileraartarnermullu Ataatsimiititaliaq

Ulloq: 12. januar 2024  
J.nr.: 01.31.06/23-01066

### Aningaasaqarnermut Ataatsimiititaliap marlunngornermi ulloq 9. januar 2024-mi aalajangiineranik Naalakkersuisunut ilisimatitsineq.

#### Qaanaap Ittoqqortoormiullu eqqaani piniartunut aningaasatigut ikiorsiinissaq. Ataatsimiititaliaq suliaa nr. 01.31.06/24-01066.

"Naalakkersuisut **inassutigaat**,

- Inatsisartut Aningaasaqarnermut Akileraartarnermullu Ataatsimiititaliap akuerissagaa, Qaanaap Ittoqqortoormiullu eqqaani ajunaarnersuartut ittumik, silap pissusaata allanngornerata kingunerisaanik, pisoqartoq taamaattumillu qinnuteqartut immikkut tamarmik 15.000,00 koruuninik ataasiartumik tunineqassasut piffinni qulaani taaneqartuni,
- kiisalu suleqatigiissitaliamik pilersitsisoqarneranut atatillugu ersarissunik malittarisassiortoqassasooq qaqugu allaffissornikkut piniartunut, aalisartunut nunalerisunullu ikiorsiisoqarsinnaanersoq silaannaap pissusiata allanngornerata kingunerisaanik piffissap sivikitsup iluani taakku isertitaat tamarmik annertuumillunniit apparisimappata

#### Aningaasaqarnermut Ataatsimiititaliap oqaaseqaatai apeqqutaalu

Suliamik suliarinninnermut atatillugu Naalakkersuisunut apeqquteqarnissaq ataatsimiititaliamit aalajangiunneqarpoq.

Qaanaami Ittoqqortoormiinilu piniartut qinnuteqaammik nassiussisimasut tamarmik ataasiartumik kr. 15.000,00-inik tunineqarnissaannik Naalakkersuisut inassuteqaataat ataatsimiititaliamit akuersissutigineqarpoq.

Naalakkersuisut inassutigaat Qaanaap Ittoqqortoormiullu eqqaani silap pissusaata allanngornerata kingunerisaanik ajunaarnersuartut ittumik pisoqartoq Inatsisartut Aningaasaqarnermut Akileraartarnermullu Ataatsimiititaliap akuerissagaa.

Naliliineq aningaasaliissutit ikiorsiissuteqarnissamut piumasaqaatinik eqquutsitsinerannik qulakkeerinnittoq tunngavigalugu ataasiartumik 15.000,00-inik aningaasartaliinissamik Naalakkersuisut qinnuteqartut ataatsimiititaliamit naatsorsutigineqarpoq. Taamaalillunilu ataatsimiititaliap aalajangiinnermini Naalakkersuisut naliliinerat aallaavigaa.

Ataatsimiititaliap taama nalunaaruteqarneranut pissutaavoq oqaasertaliussaq Naalakkersuisut suliami matumani tunngavigisaat, taamatut pisoqarsimasooq Naalakkersuisut naliliippata, Naalakkersuisut taama iliornissaannut piginnaatitsissummik imaqarmat.

### Apeqqu 1:

Suliamut atatillugu Naalakkersuisut isummernissaannut tunngavissiap aallaqqaasiutaani oqaatigineqarpoq piffinni (Qaanaami Ittoqqortoormiinu) takuneqarsinnaasorinarpoq sikunnginnera pissutigalugu piniarnermik ilaatigullu aalisarnermik inuutissarsiorsinnaaneq kalluarneqarsimasoq.

Tassunga atatillugu oqaaseq ”*takuneqarsinnaasorinarmat*” qanoq paasineqassanersoq itisilerneqassasoq ataatsimiititaliamit kissaatigineqarpoq?

### Apeqqu 2:

Piniartut piffinni siuliani taaneqartuneersut qinnuteqarsimasut agguaqatigiissillugu ataasiartumik kr. 15.000,00-inik, agguaqatigiissitsinikkut aningaasartalerneqartumik, tunineqassasut Naalakkersuisunit inassutigineqarpoq.

- a) Piffinnit qinnuteqartut tamarmik agguaqatigiissitsinikkut aningaasartaliunneqartumik tunineqarnissaanik, taamaalillunilu ikiorserneqarnissamik ataasiakkaat pisariaqartitsinerisa assigiinngissinnaanerata isiginiarnagu, aaqqiissuteqarneq sumik pissuteqarpa?
- b) Sumiiffinnut marlunnut taamaallaat tapiissuteqartoqassasoq Naalakkersuisut inassutigaa. Innutaasummi ataasiakkaat allani najugallit, matumani pineqartut assinganik naalaataqarsimasinnaasut? Ataatsimiititaliaq ataatsimut isigalugu isumaqarpoq innuttaasut assigiimmik pineqassasut. Taamaattumillu innutaasut Kalaallit Nunaata sinneraneersut aammalu piniarnikkut aalisarnikkullu aammalu nunalerinikkut pingaarnertut isertitaqartut aammalu silap pissusaa tunngavigalugu tamakkiisumik imaluunniit annertuumik tassanngaannaq isertitaqarsinnaajunnaartut malittarisassat pineqartut malillugit ikiorserneqarnissamik mattunneqassagaluarpata attanneqarsinnaanngilaq.

### Apeqqu 3:

Naalakkersuisut ima inassuteqaataannut tunngatillugu: “Suleqatigiissitaliamik pilersitsisoqarneranut atatillugu ersarissunik malittarisassiorpoq qaqugu allaffissornikkut piniartunut, aalisartunut nunalerisunullu ikiorsiisoqarsinnaanersoq silaannaap pissusiata allanngornerata kingunerisaanik piffissap sivikitsup iluani taakku isertitaat tamarmik annertuumilluunniit appariarsimappata”.

- a) Eqqortussaq pillugu ataatsimiititaliamit siunnersuutigineqassaaq inassuteqaammik kingulermi titarnerit kingulliit oqaasertaliussami Naalakkersuisut suliami matumani tunngavigisaanni allassimasut assinginik oqaasertaqartinneqassasut. Oqaasertaliussaq oqaatsinik ukuninnga naggaserneqarpoq: ” *inuussutissarsiornermi isertitaat silaannaap pissusiata kingunerisaanik piffissap sivikitsup iluani tamarmik annertuumilluunniit appariarsimappata.* ”
- b) Tamatuma saniatigut oqaasertaliussaq siuliani taaneqartoq naapertorlugu qaqugukkat aningaasatigut allaffissornikkut ikiorsiisoqarsinnaanera pillugu ersarissunik malittarisassiorpoq Naalakkersuisut ataatsimiititaliamut sooq inassuteqaatigineraat ataatsimiititaliamit nalornissutigineqarpoq. Oqaasertaliussap allaffissornikkut aqutsivigineqarnissaanut aaqquissuussinernik pisariaqartunik Naalakkersuisut ataatsimiititaliaq

akulerutinngikkaluarlugu pilersitsisinnaasut ataatsimiititaliamit tamakkiisumik tutsuigineqarpoq.

- c) Aaqqissuussinerup matumani pineqartup kingorna konto pingaarnermi 51.01.04-mi, aallarteqqinnissamut tapiissuteqartarnermut tunngasumi, aningaasat sinneruttut atugasiiissutigineqarnissaannut Naalakkersuisut qanoq naatsorsuuteqarpat?
- d) Suleqatigiissitamik siuliani taaneqartumik, Naalakkersuisoqarfinit susassaqtunit inutaqartumik, Naalakkersuisut pilersitsilersaarput. Tassunga atatillugu ataatsimiititaliamit Naalakkersuisunut eqqaasitsissutigineqassaaq UKA2023-mi oqaluuserisassamut atatillugu Naalakkersuisut namminneq allannguutissatut siunnersuummik saqqummiussimmata, taanna malillugu kattuffiit kalluarneqartut akuutereerneranni ajornartoornermi ikior-siisarnermut aaqqissuussinerup tassunga suleriaasissanik siunnersuuteqarnissamut Naalakkersuisut peqquneqarlutik. Eqqortussaq pillugu ataatsimiititaliamit paaserusunneqarpoq kattuffiit kalluarneqartut akuutinneqarnissaat Naalakkersuisunit aalajangiusermaneqarnersoq aammalu kattuffiit sorliit Naalakkersuisunit immikkut eqqarsaatigineqarnermut?

### **Aningaasaqarnermut Ataatsimiititaliap aalajangenera**

Siuliani allassimasutut oqaaseqarluni Naalakkersuisut inassuteqaataat ataatsimiititaliamit akuersissutigineqarput.

Inussiarnersumik inuulluaqqusillunga

Asii Chemnitz Narup

Aningaasaqarnermut Akileraartarnermullu Ataatsimiititaliap siulittaasua